

粵雅堂叢書

粵雅堂叢書

閻潛邱先生年譜卷三

郡後學平定張穆編

二十八年己巳五十四歲

是年健庵因子樹穀考選科道事爲副都御史許三禮所劾上章乞歸

命攜書局卽家編輯健庵復上疏言明一統志疏漏舛錯難以盡舉臣今博訪舊聞遺獻務期精核又言宋元通鑒明臣薛應旂王宗沐諸本或詳略失宜或考據抵牾或名姓互殊或日月闕謬臣請改修博採正

史雜史及諸家文集參考同異辨證是非仍倣司馬
光通鑒例作目錄考異彙爲一書

諭依議行

胡朏明禹貢錐指略例昔大司寇崑山徐公奉

敕纂修 大清一統志己巳冬公請假歸里

上許之且令以書局自隨公於是儵舍洞庭肆志蒐討
時則有無錫顧祖禹景范常熟黃儀子鴻太原閻若
璩百詩皆精於地理之學二三素心晨夕羣處

行述先是府君殫精經學佐以史籍客司寇公所時

方修一統志與顧處士景范黃處士子鴻周旋遂喜
談地理二君固地理專家也府君於古今沿革考索
尋究不遺餘力往往出其意表拙明先生嘗稱吾輩
老年人讀書只宜優柔厭飫自得之樂徵君用力太
苦太銳殆非所宜府君愈益力十餘年中成四書釋
地三續及釋地餘論若干篇又曰四書釋地三書則
以四子爲幼學首習之書而地理經古注疏集注以
後簡略蒙譌尙多故特加考隲爲經學始基又曰府
君從前四至京師二十八年歸里之後無復遠游意

矣

疏證

卷六上

憶己巳與顧祖禹景范同客京師問

景范蘇秦說燕曰南有碣石之饒注以在常山九門

縣果爾則趙地何以燕有其饒仍指今永平府是但

又在燕之東何云南景范曰凡地理言南可與東通

言北可與西通非同東與西南與北迴相反者余自

是觸處洞然

又己巳

本書作先一載蒙上庚午夏而言也茲臆改

在京

師萬季野謂余撰一統志奚必及人物人物自有史

傳諸書余頗駭其言及近覽元和郡縣圖志太平寰

宇記意果不重在此一州內或人物無或僅姓名貫

址卽閒舉生平亦寥寥數語不似明一統志誇多汎
濫令人厭觀因折衷二者之間不妨臚名宦流寓人
物列女四項但取其言與行關於地理者方得采輯
如名宦則蜀守李冰以作離堆避沫水之害而收鄴
令史起以引漳水溉鄴田富魏之河內而收列女趙
襄子姊聞夫死摩笄自殺代人以名其山收入保安
州顏文妻事姑孝甘泉湧室齊人以名其河收入益
都縣梁鴻適吳卒葬於要離冢旁切陵墓矣收爲蘇
州之流寓雷次宗徵至都爲築館鍾山西嶺下切古

蹟矣收爲江寧之流寓卽例所不收之仙釋如河上
公結廬河濱漢文帝親枉駕梅福變姓名爲吳市門
卒甚且許楊署都水掾爲太守興鴻卻陂數千頃田
汝南以饒均甯得遺蓋不惟其人惟其地不然隨甚
道德隨甚勲名及文藝苟無關地理概不得闌入何
者著書自有體要善乎杜君卿有云言地理者在辨
區域徵因革知要害察風土李宏憲云飾州邦而敘
人物因邱墓而徵鬼神乃言地理者通弊至於邱壤
山川攻守利害反略而不言元和宰相之言施於撰

述如此若張南軒論修志不可不載人物典型繫焉
世教補焉此則儒生之見以之點綴郡邑志則可非
所論大一統之書卷帙浩繁者也

案今一統志更不用潛邱之議

四庫全書提要資治通鑑後編一百八十四卷 國

朝徐乾學撰是編以元明人續通鑑者陳桎王宗沐
諸本大都年月參差事蹟脫落薛應旂所輯雖稍見
詳備而如改宋史周義成軍爲周義以胡瑗爲朱子
門人疏謬殊甚皆不足繼司馬光之後乃與鄞縣萬
斯同太原閻若璩德清胡渭等排比正史參攷諸書

作為是編艸荆甫畢欲進於朝未果而歿今原稿僅

存惟闕第十一卷書中多塗乙刪改之處相傳猶若

據手蹟也 困學紀聞卷十一 開禧追貶秦檜周南代

艸制下箋云南遷錄賓退錄駁之近漁洋文略駁之

信多子虛亡是之辭然載遺秦檜事卻可信余取以

補續通鑑稿置傳是樓云陸清獻日記庚午十月初一會姜西溟言徐健庵修

宋元通鑑甚覺掣肘蓋以南北朝為疑也 彭躬庵

傳是樓藏書記庚申暮春余因顧子景范陸子拒石

得登崑山徐公之傳是樓樓十楹跨地畝許特遠人

境無附麗啟後牖几席與玉峯相接中置皮閣七十

有二高廣徑丈有五尺以藏古今之書裝潢精好次

第臚序首經史以宋版者正位南面次有明實錄奏

議多鈔本又次諸子百家二氏方術稗官野乘齊
諸靡不具備曲直從橫部勒充四阿各有標目

二十九年庚午五十五歲

是年三月健庵歸里開局洞庭東山纂輯一統志仍

延先生及胡朏明顧景范黃子鴻姜西溟分纂時西

溟以布衣食七品俸在明史館健庵疏請偕行查初

壁集起庚午二月終六月題云玉峯大司寇徐公

予告南歸奉

旨仍領書局出都時邀姜

西溟及余偕行兩人日有唱和旗亭堠館污壁書牆

率多口占之作竹垞庚午年有送史館姜君宸英

赴包山書局詩案健庵既歸萬季野獨以

明史事畱京師館戶部尙書王公宏緒家

錢傳及徐公奉

敕修一統志開局洞庭山既又移嘉善復歸崑山先生
皆豫其事先生於地理尤精審凡山川形勢州郡沿
革瞭若指掌 行述司寇公歸里府君相與晨夕談
古援今慰譬開廣不以出處隱顯異致公嘗謂盧孝
廉六以名軒海寧人康熙己丑進士行述末填諱署
盧名款曰年家眷世同學姪 紀聞箋屢引
以言曰閻先生乃古人其學有經法亦非吳志伊輩
可望也

劄記案羊流店晉羊叔子故里在新泰縣西北六十
里南北孔道也余庚午春經此案此是潛邱偕健庵
同歸也 又劄記嘗

經過保定府新城縣其土田甲天下古所謂督亢地
至今禾稼樹藝最勝而田賦最輕又曰今藁城縣西
北二十五里有九門城四面五百餘里皆平地水一
部婁塊阜亦不可得釋地子在川上相傳卽泗水發
源處今之泉林寺在泗水縣東五十里陪尾山下余
曾往游惟有詠郭景純詩林無靜樹川無停流覺神
超形越云云又東蒙條昔過其下土人承譌厯厯指
點示我疏證卷四徂來在今泰安州新甫在今新泰
縣余屢經過之卷六下胡陵故城在魚臺縣東南六
十里沛縣西北五十里余曾親過之問距定陶之荷
澤約幾三百里彼豈知荷澤在定陶東孟豬在睢陽
東北二澤相通距僅一百四十里哉又小沂水愚過
費縣土人則呼浚河在其縣西北八十里案以上
數事皆南北孔道所必經不得其年併記於此

問

叔子之後裔有存者往尋其祖墓隆然高阜者三卽
傳出折臂三公之所復往尋其居遺址隱然若城郭

綿亙八里許因歎叔子以上九世皆二千石卿校可
爲東漢第一世家當時聚族而處居以積久日加闊
遠又蔡邕亡命江海遠跡吳會往來依泰山羊氏以
此地爲淵藪孰敢過問之種種皆與史傳關合獨後
漢書羊續太山平陽人平陽卽西漢之東平陽晉爲
新泰縣叔子晉書卻泰山南城人南城原魯南武城
晉地志亦三字名故城在今費縣西南九十里距新
泰二百四十五里意新泰叔子之祖貫已則占籍南
城耳觀武帝咸甯中詔以泰山之南武陽牟南城梁

父平陽五縣置南城郡封叔子南城侯以其爲南城人也叔子且死從弟琇述素志求葬於先人墓次狐死正邱首正欲葬其隆然高阜之旁也茲撰一統志繫續於新泰人物可也叔子以孫從祖奈晉書何且新泰縣建置沿革并未見何年改南城一筆人物豈有無根者哉要須別繫叔子於費縣人物不必拘元和志然後可

查初白題壁集有王羲文閣復中招同西溟泛舟紅橋七言絕句二首

割記

卷六上

庚午季夏置書局於洞庭東山撰輯一統

志有分得福建者來質余曰欲訪宋梁克家三山志
建置沿革斷自周職方之有七閩始不上繫禹貢何
如余曰杜氏通典敘建安長樂清源漳浦臨汀五郡
於古揚州內未見唐人遠之於禹服外者元和郡縣
圖志亦然然明一統志福州等八府竟書爲禹貢揚
州之域亦未安惟歐公妙有斟酌所撰新唐志於淮
南道曰蓋古揚州之域江南道曰蓋古揚州之南境
嶺南道曰蓋古揚州之南境南境與域字頗別微可

議者江南道領有今蘇松常嘉湖正禹貢三江震澤地江州尋陽郡有彭蠡湖皆當日之域中豈得別之爲南境惟援其例書於福建一司則可福州府曰禹貢揚州之南境泉州府曰禹貢揚州之南境下迄漳

州府並同方不卽不離蓋雖未顯見爲疆域未嘗不

爲揚州師牧之所接聲教訖於四海閩東南海也豈

唐虞之所得而遺之哉

案今一統志刻本惟於福建統部及泉州府書曰禹貢揚

州南境餘仍明統志舊曰禹貢揚州之域也

查初白允寄集題洞庭秋望圖詩注庚午秋冬閒余